

春秋公羊經何氏釋例

叙曰昔孔子有言吾志在春秋

又曰知我者其惟春秋乎罪我者其惟春秋乎蓋孟子所謂行

天子之事繼王者之迹也傳春

秋者言人人殊惟公羊氏五傳

當漢景時乃與弟子胡毋子都

等記于竹帛是時大儒董生下
帷三年講明而達其用而學大
興故其對武帝曰非六藝之科
孔子之術皆絕之弗使復進漢
之吏治經術彬彬乎近古者董
生治春秋倡之也胡毋生雖著

條例而弟子遂者絕少故其名
不及董生而其書之顯亦不及
繁露綿延迄於東漢之季鄭眾
賈逵之後曲學阿世扇中壘之
毒焰鼓圖讖之妖氛幾使義縈
重昏昆命絕紐賴有任城何邵

公氏修學卓識審決白黑而定
尋董胡之緒補莊顏之闕斷陳
元范升之訟鍼明杰之疾研精
覃思十有七年密若禽墨之守
禦義勝桓文之節制五經之師
罕能及之天不祐漢晉戎亂德

儒風不振異學爭鳴杜預范甯
吹死灰期復然既朽壤使樹藝
時無戴宏莫與辨惑唐統中外
并立學官自時厥後陸淳啖助
之流或以棄置師法燕說郢書
用無知之妄或以和合傳義斷

根取節生歧路之途支室錯迂
千喙一沸而聖人之微言大義
盡盡晦矣

大清之有天下百年開獻書之
路招文學之士以表章六經為
首于是人恥鄉僻震造競守漢

師家法若元和惠棟氏之于易
歛金榜氏之于禮其善學者也
孫東髮受經善董生何氏之書
若合符節則嘗以為學者莫不
求知聖人聖人之道備乎五經
而春秋者五經之究鑰也先漢

師儒畧皆亡國惟詩毛氏禮鄭氏易虞氏有義例可說而撥亂返正莫近於春秋董何之言受命如響然則求觀聖人久志七
十子之所傳舍是奚適焉故尋其條貫正其統紀為釋例三十

篇又析其疑滯強其守衛爲箋
一卷答難二卷又博徵諸史刑
禮之不中者爲禮議決獄二卷
又推原左氏穀梁氏之失爲申
何難鄭五卷用冀持世之志補
有折衷若乃經宜權爰捐益制

作則聰明聖智達天德之事概
乎其未之聞也已

嘉慶十年六月蘭陵申受劉逢
祿撰于東魯講舍

春秋公羊經何氏釋例目錄

卷一 張三世例第一

通三統例第二

內外例第三

卷二 時月日例第四

卷三 名例第五

褒例第六

譏例第七

卷四 貶例第八

誅絕例第九

卷五 律意輕重例第十

卷六 王魯例第十一

建始例第十二

不書例第十三

諱例第十四

卷七 朝聘會盟例第十五 崩薨卒葬例第十六

大國卒葬表第十七 小國進黜表第十八

秦吳楚進黜表第十九

卷八 公終始例第二十 娶歸終始例第二十一

致公例第二十二 公大夫世系表第二十三

大夫卒例第二十四

卷九 侵伐戰圍入滅取邑例第二十五

地例第二十六 郊禘例第二十七

闕疑例第二十八 主書例第二十九

卷十 災異例第三十

終

春秋公羊經何氏釋例卷一

武進劉禮部逢祿申受著

張三世例第一

隱元年注所傳聞之世外小惡不書書者來接內也

傳所見異辭所聞異辭所傳聞異辭注所見者謂昭定哀已與父時事也所聞者謂文宣成襄王父時事也所傳聞者謂隱桓莊閔僖高祖曾祖時事也異辭者見恩有厚薄義有深淺時恩衰義缺將以理人倫序人類因制治亂之法故於所見之世恩已與父之臣尤深大夫卒有罪無罪皆日錄之丙申季孫隱如卒是也所聞之世王父之臣恩少殺大夫卒無罪者日錄有罪者不日略之叔孫得臣卒是也所傳聞之世高祖曾祖之臣恩

淺大夫卒有罪無罪皆不日畧之也公子益師無駭卒是也於所傳聞之世見治起于衰亂之中用心尙靡狃故內其國而外諸夏先詳內而後治外錄大畧小內小惡書外小惡不書大國有大夫小國畧稱人內離會書外離會不書是也於所聞之世見治升平內諸夏而外夷狄書外離會小國有大夫宣十一年秋晉侯會狄于欒函襄二十三年邾婁鼻我來奔是也至所見之世著治太平夷狄進至于爵天下遠近大小若一用心尤深而詳故崇仁義譏二名晉魏曼多仲孫何忌是也所以三世者禮爲父母三年爲祖父母期爲曾祖父母齊衰三月立愛自親始故春秋据哀錄隱上治祖禰所以二百四十二年者取法十二公天數備足著治法式又因周道始壞絕于惠隱之際

二年公會戎于潛注所傳聞之世外離會不書書內離會者春秋王魯明當先自詳正躬自厚而薄責於人故略外也

桓二年傳所見異辭所聞異辭所傳聞異辭注復發傳者益師以臣見恩此以君見恩嫌義異也所見之世臣子恩其君父尤厚故多微詞是也所聞之世恩王父少殺故立煬宮不日武宮日是也所傳聞之世恩高祖曾祖又少殺故子赤卒不日子般卒日是也

按哀十四年傳注並同

五年齊侯鄭伯如紀傳外相如不書書離不言會也注春秋始錄內小惡書內離會畧外小惡不書外離會至所聞世著治升平內諸夏而詳錄之乃書外離會嫌外離會常書故變文見意以別嫌明疑

卷一
僖二十六年楚人滅隗以隗子歸注不名者所傳聞世見治始起責小國畧但絕不誅之

宣十一年晉侯會狄于欒函注離不言會言會者見所聞世治近升平內諸夏而詳錄之殊夷狄也下發傳于吳者方具說其義故從外內悉舉者明言之

成十五年冬十有一月叔孫僑如會晉士燮齊高無咎宋華元衛孫林父鄭公子鮪邾婁人會吳于鍾離傳殊會吳外吳也春秋內其國而外諸夏內諸夏而外夷狄言自近者始也注不殊楚者楚始見所傳聞世尙外諸夏未得殊也至於所聞世可得殊又卓然有君子之行吳似夷狄差醇而適見於可殊之時故獨殊吳

襄二十三年邾婁鼻我來奔傳邾婁無大夫以近書也注所傳聞世見治始起外諸夏錄大畧小大國有大夫小國畧稱人所聞之世內諸夏治小如大廩廩近升平故小國有大夫治之漸也見於邾婁者自近始也獨舉一國者時亂實未有大夫治亂不失其實故取足張法而已

昭三年北燕伯欵出奔齊注名者所見世著治太平責小國詳錄出奔當誅

六年春王正月杞伯益姑卒注不日者行微弱故畧之入所見世責小國詳始錄內行也諸侯內行小失不可勝書故于終略責之見其義

十六年楚子誘戎曼子殺之注戎曼稱子者入昭公見王道太

平百蠻貢職夷狄皆進至其爵

三十年冬十有二月吳滅徐徐子章禹奔楚注至此乃月者所見世始錄夷狄滅小國也不從上州來巢見義者因有出奔可貞

定元年立煬宮注不日者所見之世諱深使若比武宮惡愈故不日

六年季孫斯仲孫忌帥師圍運傳此仲孫何忌也譏二名注定哀之間文致太平欲見王者治定無所復爲譏唯有二名故譏之此春秋之制也

哀三年冬十月癸卯秦伯卒注哀公著治太平之終小國卒葬極于哀公皆卒日葬月

十有四年春西狩獲麟傳春秋何以始乎隱祖之所逮聞也所見異辭所聞異辭所傳聞異辭何以終乎哀十四年曰備矣注人道浹王道備欲見撥亂功成于麟猶堯舜之隆鳳皇來儀故麟于周爲異春秋託以爲瑞明太平以瑞應爲效也

釋曰傳曰親親之殺尊賢之等禮所生也春秋緣禮義以致太平用坤乾之義以述殷道用夏時之等以觀夏道等之不足著義將安放故分十二世以爲三等有見三世有聞四世有傳聞五世於所見微其詞於所聞痛其禍於所傳聞殺其恩由是辨內外之治明王化之漸施詳畧之文魯愈微而春秋之化益廣內諸夏不言鄙疆是也

董子觀德篇云稍之會先內衛奉本篇云諸侯伐哀

者皆言我俱勝何氏注義

世愈亂而春秋之文益治譏二名西狩獲麟是

也昔者夫子正雅南以先公之教繫之召公著王道之始基而騶虞爲之應以文王之風繫之周公著王道之太平而麟趾爲之應小雅文武爲牧伯之事也諸侯歌之其衰也至於四夷交中國微大雅文武爲天子之事也天子歌之其衰也至於西土亡王迹熄鳴鳥不聞河圖不出天乃以麟告文王旣沒文不在茲乎愀然以身任萬世之權灼然以二百四十二年著萬世之治且曰其或繼周者雖百世可知也古之造文者三畫而連其中謂之王易之六爻夏時之三等春秋之三科是也易一陰一陽乾變坤化歸於乾元用九而天下治要其終於未濟志商亡也詩書一正一變極於周亡而一終秦誓一終商頌秦誓傷周之不可復也商頌示周之可興也

夏時察大正以修王政修王政以正小正德化至於鳴雉而
推原終始之運本其興曰正月啓蟄戒其亡曰十有二月隕
麋角春秋起衰亂以近升平由升平以極太平尊親至於凡
有血氣而推原終始之運正其端曰元年春王正月公卽位
著其成曰西狩獲麟故曰治不可恃鳴雉猶獲麟也而商正
於是建矣亂不可久孛於東方螽於十二月災於戒社京師
於吳楚猶匪風下泉也而夏正於是建矣无平不陂无往不
復聖人以此見天地之心也

通三統例第二

隱元年春王正月注王者受命必徙居處改正朔易服色殊徽
號變犧牲異器械明受之于天不受之于人夏以斗建寅之月

爲正平旦爲朔法物見色尙黑殷以斗建丑之月爲正雞鳴爲
朔法物牙色尙白周以斗建子之月爲正夜半爲朔法物萌色
尙赤又注禮適夫人無子立右媵右媵無子立左媵左媵無子
立嫡姪嫡姪無子立右媵姪右媵姪無子立左媵姪
嫡質家親親先立嫡文家尊尊先立姪嫡子有孫而死質家親
親先立弟文家尊尊先立孫共雙生也質家据見立先生文家
据本意立後生皆所以防愛爭

天王使宰咺來歸惠公仲子之賵傳賵者蓋以馬以乘馬束帛

注此道

車馬曰賵貨財曰賻衣被曰襚

注此者春秋制也

二年紀履緌來逆女注禮所以必親迎者所以示男先女也于

廟告本也夏后氏逆于庭殷人逆于堂周人逆于戶

案注几詳三代異制

多本禮說
不悉載

三年春王二月注二月三月皆有王者二月殷之正月也三月夏之正月也王者存二王之後使統其正朔服其服色行其禮樂所以尊先聖通三統師法之義恭讓之禮于是可得而觀之宋公和卒注宋稱公者殷後也王者封二王後地方百里爵稱公客待之而不臣也

七年齊侯使其弟年來聘傳母弟稱弟母兄稱兄注分別同母者春秋變周之文從殷之質質家親親明當親厚異於羣公子也

十一年滕侯薛侯來朝注滕序上者春秋變周之文從殷之質質家親親先封同姓

公薨傳春秋君弑賊不討不書葬以爲無臣子也注道春秋通例與文武異

桓三年春正月注無王者見桓公無王而行也二月非周之正月所以復去之者明春秋之道亦通於三王非主假周以爲漢制而已

案在漢言漢卽傳所云制春秋之義以俟後聖也

四年春正月公狩于郎傳春日苗秋曰蒐冬曰狩注不以夏田者春秋制也以爲飛鳥未去于巢走獸未離于穴恐傷害于幼穉故于苑囿中取之

十一年鄭忽出奔衛傳忽何以名春秋伯子男一也辭無所貶注春秋改周之文從殷之質合伯子男爲一一辭無所貶皆從子夷狄進爵稱子是也忽稱子則與諸侯改伯稱子辭同于成

君故名也名者緣君薨有降既葬名義也此非罪貶也君子不奪人之親故使不離子行也王者起所以必改質文者爲承衰亂救人之失也天道本下親親而質省地道敬上尊尊而文煩故王者始起先本天道以治天下質而親親及其衰敝其失也親親而不尊故後王起法地道以治天下文而尊尊及其衰敝其失也尊尊而不親故復反之于質也質家爵三等者法天之行有三光也文家爵五等者法地之有五行也合三從子者制由中也

莊二十二年公如齊納幣注禮言納徵春秋言納幣者春秋質也

二十七年杞伯來朝注杞夏后不稱公者春秋黜杞新周而故

宋以春秋當新王黜而不稱侯者方以子貶起伯爲黜說在僖二十三年

僖二十三年注始見稱伯卒稱子者微弱爲徐莒所脅不能死位春秋伯子男一也辭無所貶貶稱子者春秋黜杞不明故以其一等貶之明本非伯乃公也又因以見聖人子孫有誅無絕故貶不失爵也

二十八年晉侯入曹執曹伯畀宋人注時天王居于鄭晉文欲討楚師以宋王者之後法度所存故因假使治之宋稱人者明聽訟必師斷與其衆共之

文十三年世室屋壞傳周公用白牡魯公用騂剛注殷牲也周公死有王禮謙不敢與文武同也不以夏黑牡者嫌改周之文

當以夏辟嫌也。辟剛周牲魯公以諸侯不嫌故從周制。

宣十六年成周宣榭災傳外災書新周也。注新周故分別有災不與宋同也。孔子以春秋當新王上黜杞下新周而故宋因天災中興之樂器示周不復興故繫宣榭于成周使若國文黜而新之從爲王者後記災也。

成十五年仲嬰齊卒傳叔仲惠伯注叔仲者叔彭生氏也。文家字積于叔叔仲有長幼故連言之。經云仲者明春秋質家當積于仲。

十七年九月辛丑用郊傳郊用正月上辛注言正月者因見百王正所當用也。三王之郊一用夏正言正月者春秋之制也。

案傳

所謂正月
即夏正

定六年仲孫忌傳譏二名注爲其難諱也一字爲名令難言而易諱所以長臣子之敬不逼下也此春秋之制也

哀十四年春西狩獲麟注河陽冬言狩獲麟春言狩者蓋據魯

變周之春以爲冬去周之正而行夏之時

按春言狩下當增不從桓四年以正月發

者十字乃明

釋曰昔顏子問爲邦子曰行夏之時乘殷之輅服周之冕終之曰樂則韶舞蓋以王者必通三統而治道乃無偏而不舉之處自後儒言之則口法後王自聖人言之則曰三王之道若循環終則復始窮則反本非僅明天命所授者博不獨一姓也夫正朔必三而改故春秋損文而用忠文質必再而復故春秋變文而從質受命以奉天地故首建五始至于治定

功成鳳皇來儀百獸率舞而韶樂作焉則始元終麟之道舉而措之萬世無難矣曰然則三正見于夏書而春秋繼詩亡而作詩顧不言何也曰詩之言三正者多矣而尤莫著于三頌夫子既降王爲風而次之邶鄘之後言商周之既亡終之以三頌非新周故宋以魯頌當夏而爲新王之明徵乎夫旣以魯頌當新王而次之周後復以商頌次魯而明繼夏者殷非所謂三王之道若循環者乎故不明春秋不可與言五經春秋者五經之筦鑰也曰通三統之義旣得聞命矣子思子之述春秋也則曰祖述堯舜憲章文武傳亦曰樂道堯舜之道而其釋五始則曰王者孰謂謂文王也不兼舉二月三月而通之何歟曰春秋之義固上貫二帝三王而下治萬世者

也文王雖受命稱王而于繫易猶以庖犧正乾五之位而謙居三公晉明夷升三卦言受祖得民而伐罪也臨商正言改正朔也夫文王道未洽于天下而繫易以見憂患萬世之心春秋象之故曰文王既沒文不在茲乎故明春秋而後可與言易易觀會通以行典禮而示人以易春秋通三代之典禮而示人以權經世之志非二聖其孰能明之

內外例第三

隱元年注所傳聞世外小惡不書書者來接內也

祭伯來傳奔也注內外皆書者重乖離之禍也

二年注凡書兵者正不得也外內深淺皆舉之

又傳外逆女不書注內逆女常書外但疾始不當書者明當先

自正躬自厚而薄責於人故畧外也

三年傳外大夫不卒注原仲不卒

案文三年定四年傳同

宋公和卒注貶外言卒所以褒內也

四年傳外取邑不書注義與上逆女同

案六年莊元年三十年宣元年昭二十有五年

哀八年傳同

十年傳春秋錄內而畧外於外大惡書小惡不書於內大惡諱

小惡書

入諱例者不重出

十一年注內適外言如外適內言朝聘所以別外尊內也

桓五年傳外相如不書

案本年及襄五年傳並同

十年傳內不言戰

十二年十年同

十三年傳內言戰恃外故從外也

十八年注加我君者錄內猶君薨地也

莊元年注內女歸例月外女不月

二年傳外夫人不卒注內女卒例日外女不日

四年傳外夫人不書葬

案莊三十年襄
三十年傳同

九年傳內不言敗

十一年傳外災不書

案二十一年宣十六
年襄九年傳同

十九年伐我西鄙注鄙者邊垂之辭榮見遠也

案此類
皆內辭

二十五年注內朝聘言如者尊內也書者錄內所交接也

二十七年注凡公出在外致在內不致

僖四年來盟于師傳言來與桓爲主也注以從內文

十六年傳外異不書

案文三年成五年
昭十八年傳同

二十五年注外小惡正之者宋以內娶故公族以弱妃黨以彊疾其末故正其本

二十六年傳乞師卑辭也外內同若辭重師也

二十八年注內殺大夫例有罪不日無罪日外殺大夫皆時

見案

諱例

公朝于王所注不書諸侯朝者外小惡不書獨錄內也不書如不言天王者從外正君臣所以見文公之功

三十二年鄭伯接卒注不書葬者殺大夫也就葬別有罪無罪惟內無貶公之道不可去葬故從殺時別之

宣元年公子遂如齊逆女注有母言如者緣內諱無貶公文十五年傳外平不書

成二年季孫行父臧孫許叔孫僑如公孫嬰齊帥師會晉郤克
衛孫良夫曹公子手及齊侯戰于鞏齊師敗績傳曹無大夫公
子手何以書憂內也注大夫敵君不貶隨從王者大夫得敵諸
侯也不從內言敗之者君子不掩人之功故從外言戰也君獲
不去師敗績者辟內敗文

三年注內不言叛

昭元年
注同

十五年傳殊會吳外吳也春秋內其國而外諸夏內諸夏而外
夷狄王者欲一乎天下曷爲以外內之辭言之言自近者始也
襄九年傳大者曰灾小者曰火內不言火者甚之也注春秋以
內爲天下法動作當先自克責故小有火如大有灾

昭二十三年戊辰吳敗頓胡沈蔡陳許之師于雞父

見進
黜表

釋曰昔文王繫易著君德于乾二辭與五同言以下而升上以內而及外也夫子贊之曰庸言之信庸行之謹閑邪存其誠善世而不伐德博而化有旨哉慎言行辨邪正著誠去偽皆所以自治也由是以善世則合內外之道也至于德博而化而君道成春秋所謂大一統也夫治亂之道非可一言而盡易變動不居由一陰一陽而窮天地之變同歸于乾元用九以見天則春秋推見至隱舉內包外以治纖芥之慝亦歸于元始正本以理萬事故平天下在誠意未聞枉已而能正人者也春秋之化極于凡有血氣之倫神靈應而嘉祥見深探其本皆窮理盡性之所致爲治平者反身以存誠強恕以求仁而已矣

公羊何氏釋例卷一終

春秋公羊經何氏釋例卷二

武進劉禮部逢祿申受著

時月日例第四

隱六年傳春秋雖無事首時過則書春秋編年四時具然後爲年注歷一時無事則書其始月也明王者當奉順四時之正也有事不月者人道正則天道定矣

十一年傳隱無正月將讓乎桓故不有其正月也

定元年春王傳何以無正月正月者正卽位也定無正月者卽位後也

桓四年注去二時者桓公無王而行天子不能誅反下聘之故爲貶見其罪明不宜

七年注去二時者桓公以火攻人君故貶明大惡

十七年注夏陽也月陰也去夏者明夫人不繫於公也

冬十月朔注去日者著桓行惡故深爲內懼其將見殺無日

莊二十二年注以五月首時者譏莊公取仇國女不可以事先
祖奉四時祭祀猶五月不宜以首時

僖二十八年注不月而日者自是諸侯不繫天子若日不繫於
月

成十年注去冬者惡成公怨懟無事天之意當絕之

昭十年注去冬者蓋昭公娶吳孟子之年故貶之

定十四年注去冬者坐淫故貶或說坐受女樂令聖人去冬陰
臣之象也

成十七年傳非此月日也以此月日卒待君命然後卒大夫
成十八年注二月庚申日上繫於正月者起正月見幽二月庚
申日死也

昭二十五年秋七月上辛大雩季辛又雩注但舉日不舉辰者
辰不同不可相爲上下又日爲君辰爲臣去辰則逐季氏意明
矣上不日言上辛者爲下辛張本不言下辛言季辛者起季氏
不執下而逐上

隱元年注十言有二者起下復有二非十中之二
僖十有六年傳是月者僅逮是月也春秋不書晦也

隱二年注朝聘會盟例皆時

案朝公會公同
盟如會皆同

莊二十五年注內朝聘言如者尊內也朝京師大國善有加錄

文如楚有危文聘無月者比於朝輕

僖十年注書如者錄內所與外交接也故如京師善則月榮之如齊晉善則月安之如楚則月危之明當尊賢慕大無友不如已者

隱四年注遇例時

隱元年注君大夫盟例日惡不信也小信月大信時

又注微者盟例時不能專正故責畧之

桓十一年注未命大夫盟會用兵不日上不及大夫下重於士罰疑從輕故責之畧

桓十四年注莅盟來盟例皆時從內爲王義明王者當以至信

先天下

案來聘而尋舊盟例日惡之又伐而盟者例日爲將復伐

僖十九年注會盟不日者不信已明無取於日自其正文也

莊十三年傳桓之盟不日信之也

案魯桓盟皆日危之也

補注平例時不易者月

隱二年注侵伐圍入例皆時又注入例時傷害多則月

案義兵例月

莊二十八年傳伐不日

僖二十二年傳偏戰者日三十三年傳詐戰不日注不言敗績

外詐戰文也詐卒也齊人語也

隱六年注戰例時偏戰日詐戰月

隱二年注滅例月定四年八年注定哀滅例日

僖二十八年注夷狄滅微國不月略之

僖元年注遷例大國月重煩勞也小國時

隱十年文七年傳取邑不日

隱四年注取邑例時

宣十年注凡歸邑物例皆時

莊三十一年注獻捷例時

莊六年注救例時

僖四年注潰例月叛例時

莊三年注次例時

莊十八年注追例時

襄五年注戍例時

僖二十六年注乞師例時

哀九年注詐取師不月疾略之

桓七年注焚日者疾之

桓十六年注致例時僖四年注凡公出滿三時月危公之久

補注天王崩例口葬例月從大國例

隱二年注夫人薨日者恩錄之公夫人皆同例

桓十八年注葬我君例日起生者之事也且明王者當遣使者

與諸侯共會之

桓十八年注凡公薨外致日危痛之

案夫人薨外致同例

隱八年傳卒日而葬不日卒赴而葬不告

隱三年傳葬不及時而日渴葬也不日慢葬也過時而日隱之

也不日謂之不能葬也當時而不日正也日危不得葬也

隱四年注卒日葬月達於春秋爲大國例

桓十年注小國始卒當卒月葬時哀三年注小國卒葬極於哀
公皆卒日葬月

隱元年注所傳聞世大夫卒有罪無罪皆不日略之也所聞世
無罪者日錄有罪者不日略之所見世有罪無罪皆日錄之

案命大夫卒例月外大夫不卒卒例月
不葬葬例時視小國君次內大夫也

莊二年注內女卒例日外女不日者寔不如魯女

案內女不
葬葬例月

僖九年注許嫁卒者有即貴之漸日者恩尤重於未命大夫故
從諸侯夫人例

宣十六年注棄歸例有罪時無罪月

莊二十七年注女會來例皆時

隱二年注內女歸例月莊元年注外女不月者寔不如魯女

成八年注媵例時

桓三年宣元年注夫人至例月文九年注奔喪致例月者婦人

危重從始至例

案夫人出會如他國月者諱之

莊二十四年注醜夫人例日

隱四年注弑例日從外赴詞以賊聞例

案諸侯相殺同例

文元年注夷狄子弑父忍言其日襄三十年注中國子弑父不

忍言其日

文十八年注稱國以弑例皆時者略之

僖九年注外弑未踰年君例月

隱四年注討賊例時

僖二十八年注內殺大夫例有罪不日無罪日外殺大夫皆時

案殺世子
母弟同例

文八年注大夫相殺例皆時

定元年注大夫執無例

疏諸侯相執例
月案當例時

桓十一年注執大夫例時

閔二年注凡公夫人奔例日月者有罪昭二十九年注唁例時

昭二十一年注大國奔例月成十二年注不月者小國也

閔二年注內大夫奔例無罪者日有罪者月外大夫奔例皆時

案世子奔放人夫
大夫相放同例

隱四年注大國篡例月小國時立納入皆爲篡

襄二十三年注篡大夫位例時

僖二十八年注復歸例皆時

定元年傳卽位不日

定九年注竊實不月得亦不月

隱五年文二年注失禮鬼神例日

莊二十三年注失禮宗廟例時

成十七年注郊日者明用辛例不郊則不日

案卜郊例月

文十三年定二年注不務公室例月

案新作例時不務者久不修也

隱七年注城邑例時

案外城例月別于內城

莊元年注築例時

案浚同例

文十六年注毀例時

案墮同例

補注變制例時新作南門初稅畝用田賦不月是其例也

隱五年注觀例時

桓四年注狩例時六年注蒐例時

隱二年注親迎例時不親迎例月

桓六年注世子生日者喜錄之

成八年注錫命例月爲魯喜錄之

隱元年注王使歸貺月者爲內恩錄之諸侯不月比於王者輕

會葬皆同例疏諸侯身來書月舊解非也

桓十五年注求例時

隨元年注凡災異一日者日歷日者月歷時者加白文爲異

災不書書例時

朝例時

桓二年秋七月紀侯來朝注月者明不臣后父所以廣孝敬

六年春正月寔來注月者危錄之無禮之人不可脩責之

疏不備責

故不善日

僖十四年夏六月季姬及鄆子遇于防使鄆子來朝注月者甚

惡內也

內朝加錄文例

僖十年春王正月公如齊注月者僖公本齊所立桓公德衰見叛獨能念恩朝事之故善錄之

十五年春王正月公如齊注月者善公既能念恩尊事齊桓又合古五年一朝之義故錄之

二十八年冬王申公朝於士所傳其目錄乎內也注危錄內再失禮將爲有義者所惡不月而日者自是諸侯不繫天子若日

不繫於月

三十三年冬十月公如齊注月者善公念齊恩及子孫

宣九年春王正月公如齊注月者善宣公事齊合古禮卒使齊
歸濟西田不就十年月者五年再朝近得正

成十三年春三月公如京師注月者善公尊天子

襄八年春王正月公如晉注月者鄒之會鄭伯以弑陳侯逃歸
公獨修禮於大國得自安之道故善錄之

二十一年春王正月公如晉注月者梁之盟後中國方乖離
善公獨能與大國

昭二十八年春王正月公如晉次于乾侯注月者閔公內爲強
臣所逐外如晉不見答後不月者錄始可知

聘例時

襄三十年春王正月楚子使遺頗來聘注月者公數如晉

疏若何作

如楚字者誤也案當作楚襄昭皆如楚楚子不來朝故云希見答疏非

希見答今見聘故喜錄之

會例時

隱十年春王二月公會齊侯鄭伯于中邱注月者隱前爲鄭所

獲今始與相見故危錄內明君子當犯而不校也

案十有一年夏五月同例

桓元年春三月公會鄭伯于垂注桓公會皆月者危之也

僖元年八月公會齊侯宋公鄭伯曹伯邾婁人于訂注月者危

公會霸者而與邾婁有辨也不從有夫人喪出會惡之者不如

危重也

十六年冬十有二月公會齊侯宋公陳侯衛侯鄭伯許男邢侯

曹伯于淮注月者危桓公德衰任豎刁易牙墮功滅項自此始也

成十五年冬十有一月叔孫僑如會晉士燮齊高無咎宋華元衛孫林父鄭公子鮪邾人會吳于鍾離注月者危錄之諸侯既委任大夫復命交接夷狄

襄十四年春王正月季孫宿叔老會晉士匄齊人宋人衛人鄭公孫燕曹人莒人邾婁人滕人薛人杞人小邾婁人會吳于向注月者危刺諸侯委任大夫交會疆夷臣日以疆三年之後君若贅旒然

定四年三月公會劉子晉侯宋公蔡侯衛侯陳子鄭伯許男曹伯莒子邾婁子頓子胡子滕子薛伯杞伯小邾婁子齊國夏于

召陵侵楚注月而不舉重者楚以一裘之故拘蔡昭公數年然後歸之諸侯雖然侵之會同最盛故善錄其行義兵也

君大夫盟例曰小信月大信時

桓十一年柔會宋公陳侯蔡叔盟于折注盟不日者未命大夫盟會用兵上不及大夫下重於士罰疑從輕故責之畧

莊九年春公及齊大夫盟于豎注不月者是時齊以無知之難小白奔莒子糾奔魯齊迎子糾欲立之魯不與而與之盟齊爲是更迎小白然後乃伐齊欲納子糾不能納故深諱使若信者也

十九年秋公子結媵陳人之婦于鄆遂及齊侯宋公盟注冬齊人宋人陳人伐我西鄙而盟不日者起國家後背結之約非結

不信也

二十二年秋七月丙申及齊高侯盟于防傳公也注以其日微者不得日大夫盟當出名氏

文二年三月乙巳及晉處父盟傳注日者起公盟也

見諱例

夏六月公孫敖會宋公陳侯鄭伯晉士穀盟于垂斂注不日者欲共盟誅商臣雖不能誅猶爲疾惡故褒與信詞

七年秋八月公會諸侯晉大夫盟于扈注文公內則欲久喪而後不能喪娶逆祀外則貪利取邑爲諸侯所薄賤不見序故深諱爲不可知之詞不日者順諱爲善文也

十四年六月公會宋公陳侯衛侯鄭伯許男曹伯晉趙盾癸酉同盟于新城注盟下日者刺諸侯微弱信在趙盾

成元年夏臧孫許及晉侯盟於赤棘注時者謀結牽戰不相負也後爲晉所執謂十六年季孫行父不日者執在三年外尋舊盟後非此盟所可保

十八年十有二月仲孫蔑會晉侯宋公衛侯邾婁子齊崔杼同盟于虛朶注不日者時欲行義爲宋誅魚石故善而爲信詞或喪盟略

襄三年六月公會單子晉侯宋公衛侯鄭伯莒子邾婁子齊世子光已未同盟于雞澤注盟下日者信在世子光也

昭十一年仲孫貜會邾婁子盟于侵羊注不日者蓋諱喪盟使若議結善事

定三年冬仲孫何忌及邾婁子盟于枝注後相犯時者諱公使

大夫盟又未踰年君薄父子之恩故爲易詞使若議結善事

隱元年三月公及邾婁儀父盟于昧注月者隱推讓以立邾婁慕義而來相親信故爲小信辭也

二年秋八月庚辰公及戎盟于唐注後不相犯日者爲後背隱而善桓能自復爲唐之盟

桓二年公及戎盟于唐注不日者案桓盟例皆日危之也戎怨隱不反國

善桓能自復翕然相親信

僖十九年夏六月宋人曹人邾婁人盟于曹南郕子會盟于邾婁注沒襄公使若微者盟不日者深順諱文從微者例會盟不日者言會盟不信已明無取於日自其正文也

二十八年五月癸丑公會晉侯齊侯宋公蔡侯鄭伯衛子莒子

盟于踐土注日者諺也

文八年冬十月壬午公子遂會晉趙盾盟于衡雍乙酉公子遂會伊維戎盟于暴注四日不能再出不卒名者非一事再見也

案僖三十年公子遂如京師遂如晉非公命也今有公命故詳其月以別之且起前之非公命

宣十一年夏楚子陳侯鄭伯盟于辰陵注不日者莊王行霸約諸侯明王法討微舒善其憂中國故爲信辭

成五年十有二月己丑公會晉侯齊侯宋公衛侯鄭伯曹伯邾

婁子杞伯同盟于蟲牢注約備強楚

案六年楚伐鄭喪不能救晉又侵之故日責之

九年公會晉侯齊侯宋公衛侯鄭伯曹伯莒子杞伯同盟于蒲

注不日者已得鄭盟當以備楚而不以罪執之旋使離叛楚緣隙潰莒不能救禍由中國無信故諱爲信辭使若莒潰非盟失

信所以甚中國與下潰日相起

襄十九年春王正月諸侯盟于祝阿晉人執邾婁子注下有執不日者善同伐齊故褒與信詞

昭二十六年秋公會齊侯莒子邾婁子杞伯盟于鄆陵注不月者時諸侯相與約欲納公故爲內喜爲大信詞

定四年五月公及諸侯盟于浩油注後楚復圍蔡不救不日者善諸侯能翕然俱有疾楚之心會同最盛故褒與信辭

微者盟例時

隱元年九月及宋人盟于宿注月者隱公賢君雖使微者有可采取故錄也

桓十一年春正月齊人衛人鄭人盟于惡曹注月者桓公行惡

諸侯所當誅屬上三國來戰於郎今復使微者盟故爲魯懼危錄之

僖二十九年夏六月立會王人晉人宋人齊人陳人蔡人秦人盟于狄泉注晉文威信不行上假王人以會諸侯年老志衰不能自致故諸侯亦使微者會之月者惡霸功之廢於是案左氏公字何氏例及此注正當設公蒞傳寫之誤

來盟例時

文十五年三月宋司馬華孫來盟注月者文公微弱大夫秉政宋亦蔽於三世之黨三亂結盟故不與信辭錄華孫者明惡二國非以月惡華孫也

桓之盟不日

莊二十三年十有二月甲寅公會齊侯盟于扈傳何以日危之也哉貳也

僖九年夏公會宰周公齊侯宋子衛侯鄭伯許男曹伯于葵邱秋九月戊辰諸侯盟于葵邱傳何以日危之也桓公震而矜之叛者九國

平例時

隱六年春鄭人來輸平注不月者正月也見隱終無奉正月之意案十一年傳隱何以無正月注據六年輸平不易

宣四年春王正月公及齊侯平莒及鄭莒人不肯公伐莒取向注月者惡錄之

宣十五年夏五月宋人及楚人平注月者專平不易

昭七年春王正月暨齊平注月者刺內暨暨也時魯方結婚於吳外慕強楚故不汲汲於齊

定十年春王三月及齊平注月者頓谷之會齊侯欲執定公故不易

侵例時

莊十年二月公侵宋注月者屬北敗彊齊之兵南侵彊宋南北有難故危之

僖四年春王正月公會齊侯宋公陳侯衛侯鄭伯許男曹伯侵蔡蔡潰注月者善義兵也

冬十有一月公孫慈帥師會齊人宋人衛人鄭人許人曹人侵陳注月者刺桓公不修其師因見患誑不內自責乃復加人以

罪

定四年三月公會劉子晉侯宋公蔡侯衛侯陳子鄭伯許男曹伯莒子邾婁子頓子胡子滕子薛伯杞伯小邾婁子齊國夏于召陵侵楚注月者會同最盛故善錄其行義兵也

案僖四年月爲潰出此月

出爲會

六年二月公侵鄭注月者內有強臣之讐不能討而外結怨故危之

八年春王正月公侵齊公至自侵齊二月公侵齊三月公至自侵齊注出入月者內有強臣之讐外犯疆齊再出尤危於侵鄭故知入亦當蒙上月

伐例時

桓十五年冬十有一月公會齊侯宋公衛侯陳侯于侈伐鄭注
月者善諸侯征突錄義兵也

莊三年春王正月溺會齊師伐衛注月者衛朔背叛出奔天子
新立衛公子畱齊魯無憚天子之心而伐之故明惡重於伐故
月也

二十八年春王三月甲寅齊人伐衛衛人及齊人戰衛人敗績
傳伐不日此何以日至之日也

僖十五年秋七月齊師曹師伐厲注月者義兵葵邱之會叛天
子命者也

十八年春王正月宋公曹伯衛人邾婁人伐齊注月者與襄公
之征齊善錄義兵

昭四年秋七月楚子蔡侯陳侯許男頓子胡子沈子淮夷伐吳
執齊慶封殺之遂滅厲注月者善義兵
案例月當爲滅出夷狄滅微國至所見世乃月
始此又案昭五年冬楚子越人伐吳注義兵不月者進越
爲義兵明故省文則此若伯討義兵益明何待加月乎

戰例時偏戰日詐戰月

隱六年春鄭人來輸平傳狐壤之戰隱公獲焉注不日者鄭詐
不月者正月也見隱終無奉正月之意

僖二十二年冬十有一月己巳朔宋公及楚人戰于泓宋師敗
績傳偏戰者日爾此其言朔何春秋詞繁而不殺者正也

三十三年夏四月辛巳晉人及姜戎敗秦于殽傳詐戰不日此
何以日盡也

晉人敗狄于箕注不月者略微者與夷狄也

文十一年冬十月甲午叔孫得臣敗狄于鹹傳狄者何注嫌夷狄不能結日偏戰長狄也其言敗何注据敗者內戰文非殺一人也大之也其日何大之也注如結日大戰

成元年秋王師敗績于貿戎傳不言敗之王者無敵莫敢當也注不日月者深正之使若不戰

昭十七年楚人及吳戰于長岸傳詐戰言戰敵也注不月者略兩夷

圍例時

襄十二年春王三月莒人伐我東鄙圍台注蕭魚之會服鄭最難不務長和親復相貪犯故諱取而言圍以起之月者加責之十五年夏齊侯伐我北鄙圍成注此不月十二年月者疾始可

知

定十二年十有二月公圍成公至自圍成注月又致者天子不親征下士諸侯不親征叛邑圍成不能服不能以一國爲家甚危若從他國來故危錄之

入例時傷害多則月

隱十年冬十月壬午齊人鄆人入盛注日者盛魯同姓於隱篇再見入者明當憂錄之

十一年秋七月壬午公及齊侯鄆伯入許注日者危錄隱公也爲弟守國不尙推讓數行不義皇天降灾諂臣進謀終不覺悟又復構怨入許危亡之釁外內並生故危錄之

僖二十七年乙巳公子遂帥師入杞注日者杞屬修禮朝魯雖

無禮君子當躬自厚而薄責於人不當乃入之故錄責之

二十八年三月丙午晉侯入曹執曹伯畀宋人注義兵日者善義兵得時入

文十五年晉卻缺帥師伐蔡戊申入蔡傳其日何至之日也

宣十一年冬十月楚人殺陳夏徵舒丁亥楚子入陳注日者惡莊王討賊之後欲利其國也

襄二十五年六月壬子鄭公孫舍之帥師入陳注日者陳鄭皆楚之與國今鄭背楚入陳明中國當憂助鄭以離楚弱陳故爲中國憂錄之

定四年庚辰吳入楚注日者惡其無義

哀七年秋公伐邾婁八月己酉入邾婁以邾婁子益來注日者

惡魯侮奪邾婁無已復入獲之

滅例月

隱十年宋人衛人蔡人伐滅鄭伯伐取之注不月者移惡上三國

僖五年冬晉人執虞公注不從滅例月者略之

十七年夏滅項注不月者桓公不坐滅略小國

案當是盈諱文使若非滅不諱

滅者邇內也不書齊師遷取降者嫌項邑也不書大去者項君死位且無當逐義也

二十五年春王正月丙午衛侯燬滅邢傳燬何以名滅同姓也

注日者爲魯憂內錄之

宣十五年六月癸卯晉師滅赤狄潞氏以潞子嬰兒歸注日者痛錄之

襄六年莒人滅郕注不月者取後於莒非兵滅

十年夏五月甲午遂滅偃陽注日者甚惡諸侯不崇禮義以相安反遂爲不仁開道疆夷滅中國中國之禍連蔓日及故疾錄之

昭八年冬十月壬午楚師滅陳執陳公子招放之于越殺陳孔瑗葬陳哀公注日者疾詐諛滅人也

十一年冬十有一月丁酉楚師滅蔡執蔡世子有以歸用之注日者疾諛滅人

定哀滅例日

哀八年春王正月宋公入曹以曹伯陽歸傳不言滅諱同姓之滅力能救之而不救也注不日者深諱之

夷狄滅微國不月

宣十二年冬十有二月戊寅楚子滅蕭注曰者屬上有王言今反滅人故深責之

昭四年秋七月楚子蔡侯陳侯許男頓子胡子沈子淮夷伐吳執齊慶封殺之遂滅厲注莊王滅蕭曰此不日者靈王非賢責之畧

十三年吳滅州來注不日舊本作月者畧兩夷

三十年冬十有二月吳滅徐徐子章禹奔楚注至此乃月者所見世始錄夷狄滅小國也不從上州來巢見義者因有出奔可責

遷例大國月小國時

莊十年三月宋人遷宿汪月者遷取王封當與滅人同罪

案閔二年

齊人遷陽同例

僖元年夏六月邢遷于陳儀注月者霸者所助城故與大國同
三十一年秋圍衛十有二月衛遷于帝邱注月者惡大國遷至
小國城郭堅固人衆強遷徙畏人故惡之

潰例月

成九年楚公子嬰齊帥師伐莒庚申莒潰注日者錄責中國無
信同盟不能相救至爲夷狄所潰

取邑例時

隱十年六月王戌公敗宋師于菅辛未取郕辛巳取防傳取邑
不日此何以日一月而再取也甚之也

莊三十年秋七月齊人降鄆傳紀之遺邑也盡也注月者重於取邑

文七年春公伐邾婁三月甲戌取須朐遂城鄆傳取邑不日此何以日內辭也使若他人然

宣元年六月齊人取濟西田傳爲弑子赤之賂也注月者惡內

甚於邾婁子益

疎彼爲侵奪小國此爲集適罪重於彼

四年春王正月公及齊侯平莒及邾莒人不肯公伐莒取向注月者行義爲利惡錄之

昭元年三月取運傳內之邑也注月者爲內喜得之

辨見箋

二十五年十有二月齊侯取運傳爲公取之也注月者善錄齊侯

獻捷例時

莊三十一年六月齊侯來獻戎捷注月者刺齊桓驕慢恃盈非所以就霸功也

救例時

莊六年春王三月壬子突救衛注月者嫌實微者故加錄之以起實貴子突

至例時凡公出滿三時月

桓十六年秋七月公至自伐鄭注月者善其比與善行義故以致復加月也

莊六年秋公至自伐衛注久不月者不與伐天子也故不爲危錄之

文十三年冬公如晉衛侯會公于沓 十有二月己丑公及晉侯盟還自晉鄭伯會公于斐十有四年春王正月公至自晉注月者爲臣子舊錄上事

成六年春王正月公至自會注月者前魯大夫獲齊侯今親相見故危之

十三年秋七月公至自伐秦注月者危公幼而遠用兵

十七年十有一月公至自伐鄭注月者方正下壬申故月之

襄二十二年春王正月公至自會注月者危公前疆隨鄭有邾婁地又受其叛臣邑而今與會不於上會月者與日食同月不得復見

昭二十六年三月公至自齊居于運注月者閔公失國居運後

不復月者錄始可知

定八年春王正月公侵齊公至自侵齊二月公侵齊三月公至

自侵齊

案見前侵例時下

天王葬例月

莊三年五月葬桓王傳改葬也注改葬服輕不當月月者時無非常之變樂奢改葬爾故惡錄之

文九年二月叔孫得臣如京師辛丑葬襄王注日者僖公成風之喪襄王比加禮故恩錄之所以甚責內

案昭六年叔鞅如京師葬景王不日故云

大國例卒日葬月

隱三年八月庚辰宋公和卒冬十有二月癸未葬宋繆公傳葬不及時而日渴葬也日慢葬也過時而日隱之也不日謂之不

能葬也當時而不日正也當時而日危不得葬也此當時何危
爾宣公死繆公立逐其二子莊公馮與左師勃致國乎與夷莊
公馮弑與夷故君子大居正宋之禍宣公爲之也注危之於此
者死乃反國非至賢不能不爭也宣公死而讓開爭原也繆公
亦死而讓得爲功者反正也

文七年夏四月宋公王臣卒注不日者內娶略

成十五年夏六月宋公固卒注不日者多取三國勝非禮故畧

之

宋右

僖二十四年晉侯夷吾卒注不日月者失衆身死子見篡逐故

略之猶薛伯定也

右晉

襄十九年冬葬齊靈公注不月者抑其父嫌子可得無過

案謂十九

年變伐故奪臣子恩明光代父從政處諸侯之上不孝也

言圖哀五年閏月葬齊景公傳閏不書此何以書喪以閏數略也注

以月數恩殺故并閏數

右齊

桓五年春甲戌己丑陳侯鮑卒傳曷爲以二日卒之幟也甲戌之日亡己丑之日死而得君子疑焉故以二日卒之也

夏葬陳桓公注不月者責臣子也知君父有疾當營衛不謹而失之也傳曰葬生者之事

僖二十八年陳侯款卒注不日者賤其歧意於楚

宣十二年春葬陳靈公注不月者獨甯儀行父有訴楚功上已

言納故從餘臣子恩薄略之

案殺世治無罪例去葬詳責不討賊故書葬不月終以殺無罪略之

注非也

右陳

僖十四年冬蔡侯肸卒注不月者賤其背中國而附父讎故略之甚也

宣十七年夏葬蔡文公注不月者齊桓晉文沒後先背中國與楚故略之與楚在文十年

昭二十三年夏六月蔡侯東國卒于楚注不日者惡背中國而與楚故略之月者比肸附父讎責之淺也

右蔡

桓十二年冬十有一月丙戌 丙戌衛侯晉卒注不蒙上日者春秋獨晉書立記卒耳當蒙上日與不嫌異於篡例故復出日明同

僖二十五年秋葬衛文公注不月者滅同姓故奪臣子恩也

昭七年秋八月戊辰衛侯惡卒十有二月癸亥葬衛襄公注當

時而日者世子輒有惡疾不早廢之臨死乃命臣下廢之自下廢上鮮不爲亂故危錄之右衛

襄八年夏葬鄭僖公傳賊未討何以書葬爲中國諱也注不月者本寔當去葬責臣子故不足也右鄭

小國始卒卒月葬時極於哀公卒日葬月

桓十年春王正月庚申曹伯終生卒夏五月葬曹桓公注卒日葬月者曹伯年老使世子來朝春秋敬老重恩故爲魯恩錄之尤深

莊二十三年冬十有一月曹伯射姑卒注曹達春秋常卒月葬時也始卒日葬月嫌與大國同後卒而不日入所聞世可日不復日

宣十四年夏五月庚申曹伯壽卒注日者公子喜時父也緣臣

子尊榮莫不欲與君父共之故加錄之所以養孝子之志許人

子者必使人父也

右曹

僖四年夏許男新臣卒注不月者為下盟去月方見大信

哀十三年夏許男戌卒秋葬許元公注比陳蔡不當復卒故卒

葬略

解云陳蔡為大國所復戌自復罪惡深故去日月以見矣

右許

成十四年春王正月莒子朱卒注莒大於邾婁至此乃卒者庶

其見殺不得卒至此始卒又不得日

昭十四年八月莒子去疾卒注入昭公卒不日不書葬者本纂

故因不序不葬者為下未踰年而殺其君之子不孝尤甚故重

責之

右莒

莊十六年冬十有二月邾婁子克卒注小國未嘗卒而卒者為慕伯者有尊天子之心行進也不日始與伯者未如瑱瑱卒在

二十八年

二十八年夏四月丁未邾婁子瑱卒注日者附從霸者朝天子

行進

解外相如例所不書故無其文何氏以理知之

文十三年夏五月壬午邾婁子邾條卒

襄十七年春王二月庚午邾婁子邾卒

昭元年六月丁巳邾婁子華卒秋葬邾婁悼公

定三年辛卯邾婁子穿卒秋葬邾婁莊公

案隱元年傳云僖父稱字漸進也桓十七

年注云元功之臣有誅無絕故入所見世日卒時葬比於許也

右邾婁

宣九年八月滕子卒 成十六年夏四月辛未滕子卒注滕始

卒于宣公曰於成公不名邾婁始卒於文公曰於襄公名俱葬

於昭公是以知滕小

解云莊十六年克卒二十八年瑱卒以行而得書卒書曰非其常例故云始卒于文

公卒於七年書滕侯卒桓二年退本所書子則封同姓亦非常例

昭三年春王正月丁未滕子泉卒夏叔弓如滕五月葬滕成公

注月者襄公上葬諸侯莫肯加禮獨滕子來會葬故恩錄之明

公當自行不當遣大夫失禮尤重以責內

滕石

昭三十一年夏四月丁巳薛伯穀卒秋葬薛獻公注始卒便名

曰書葬者薛比滕最小迫後定寅皆當略

定十二年春薛伯定卒夏葬薛襄公注不日月者子無道當廢

之而以爲後未至三年失衆見弑禍端在定故略之

哀十年夏薛伯寅卒秋葬薛惠公注卒葬略者與杞伯益姑同

右

僖二十三年冬十有一月杞子卒注卒者桓公存王者後功尤美故爲表異卒錄之不名不日不書葬者從小國例

襄六年春王三月壬午杞伯姑容卒秋葬杞桓公注始卒便名曰書葬者新黜未忍便畧也

昭六年春王正月杞伯益姑卒夏葬杞文公注卒不日者行微弱故略之上城杞已貶復卒略之者入所見世責小國詳始錄內行也諸侯內行小失不可勝書故于終畧責之見其義

定四年杞伯戊卒于會注不日與盟同日

案上注盟不日與信辭右杞

襄十八年十有一月甲寅乙未楚子昭卒注乙未與甲寅相去四十二日蓋閏月也葬以閏數卒不書閏者正取替月朔期

三年之喪始死得以閏數非死月不得數閏

右楚

襄十二年秋九月吳子乘卒注至此卒者與中國會同本在楚

後賢季子因始卒其父是後亦欲見其迭爲君卒皆不日吳遠

於楚

右吳

文十八年秦伯瑩卒注秦穆公也至此卒因其賢

解左氏以爲秦公殺梁無

解案說見箋

哀三年冬十月癸卯秦伯卒四年春王三月葬秦惠公注哀公

著治大平之終小國卒葬極于哀公者皆卒曰葬月

右秦

所見世大夫日卒所聞世無罪日有罪不日所傳聞世不日

隱五年冬十有二月辛巳公子彊卒注日者隱公賢君宜有恩

禮于大夫益師始見法無駭有罪据俠又未命也故獨得于此

日

莊三十二年秋七月癸巳公子牙卒注日者錄季子過惡也行誅親親雖醜之猶有恩也

僖十六年三月壬申公子季友卒夏四月丙申鄆季姬卒秋七月甲子公孫慈卒注日者僖公賢君宜有恩禮於大夫故皆日也一年喪骨肉三人故日痛之

文十四年九月甲申公孫敖卒于齊注已絕卒之首為後齊魯歸其喪有恥故為內諱使若尚為大夫
哀八年公孫敖如京師不至復而歸葬

注日者嫌敖罪明則起石棘故諱使若無罪然則卒日者亦盈諱文

宣五年叔孫得臣卒注不日者知公子遂欲弑君為人臣知賊而不言明當誅

八年夏六月公子遂如齊至黃乃復辛巳有事于太廟仲遂卒
 于垂壬午猶繹萬入去籥傳何以不稱公子貶曷為貶注据叔
 孫得臣卒不貶為弑子赤貶注加字者起嬰齊所氏明為歸父
 後大宗不得絕也日者不去樂也日者于起明日也案去公子
 為謂大夫喪通例

補注外大夫不卒卒例月不葬葬例時

隱三年夏四月辛卯尹氏卒傳外大夫不卒此何以卒天王崩
 諸侯之主也注日者恩錄之明當有恩禮

文二年夏五月王子虎卒注尹氏卒日此不日者在期外也

曾葬在

二年

定四年秋七月劉卷卒注不日者比尹氏以天子喪為主重也

此卷主會經故不日

內女卒例日補注葬例月

莊四年三月紀伯姬卒六月乙丑齊侯葬紀伯姬注卒不日葬
日者魯本宜葬之故移恩錄文於葬

二十九年冬十有二月紀叔姬卒三十年八月癸亥葬紀叔姬

注國滅卒者從夫人行待之以初也

案叔姬媵也月卒日葬紀李葬之例同上

成五年春王正月杞叔姬來歸八年冬十月癸卯杞叔姬卒注
棄而日卒者為下替杞歸其喪張本文使若尚為杞夫人

內女棄歸例有罪時無罪月

文十四年冬單伯如齊齊人執單伯齊人執子叔姬十五年十
有二月齊人來歸子叔姬注月者閔錄之從無罪例

案歸公孫教之喪注

不月者不月思
錄與子叔姬異

夫人至例月

莊二十四年八月丁丑夫人姜氏入傳其言入何難也其月何
難也與公有所約然後入

補注夫人出會如外國例月

莊四年春王二月夫人姜氏饗齊侯于祝邱注三出不月者省
文從可知例

莊十九年夫人姜氏如莒二十年春王二月夫人姜氏如莒注
月者再出也不從四年已月者異國

弑例日案諸侯相殺同例

僖十年春王正月晉里克弑其君卓子及其大夫荀息注不日

者不正過禍終始惡明故畧之

十九年夏六月己酉邾婁人執鄆子用之注日者魯不能防正其女以至於此明富痛其女禍而自責之

文十四年齊公子商人弑其君舍注從成君不日者與卓子同十六年冬十有一月宋人弑其君處白注不日者內娶略賤之宣十八年秋七月邾婁人戕鄆子于鄆注小國本不卒故亦不日

襄二十九年闔弑吳子餘祭

案不蒙日卒本不日也

三十一年十有一月莒人弑其君密州

案不日者卒本不日

昭十三年夏四月楚公子比自晉歸于楚弑其君虔于乾谿楚公子棄疾弑公子比注不日者惡靈主無道

十有六年春楚子誘戎曼子殺之注不日者本不卒

案十六年殺蔡般日

者蔡本

哀六年齊陽生入于齊齊陳乞弑其君舍注不日者與卓子同

世子弑例分內外

文元年冬十月丁未楚世子商臣弑其君髡注夷狄子弑父忍言其日

襄三十年夏四月蔡世子般弑其君固注不日者深為中國隱痛有子弑父之禍故不忍言其日

昭十九年夏五月戊辰許世子止弑其君買注日者加弑爾非寔弑也

稱國以弑例時

成十八年春王正月庚申晉弑其君州蒲注日者二月庚申日上繫於正月者起正月見幽二月庚申日死也厲公猥殺四六夫臣下人人恐見及以致此禍故日起其事深爲有國者戒也昭二十七年夏四月吳弑其君僚注不書閭閻弑明季子不忍相殺讓國閭閻也月者非失衆見弑故不略之

案不日者卒本不日也

外弑未踰年君例月

莊九年九月齊人取子糾殺之注月者從未踰年君例

僖九年冬晉里克弑其君之子奚齊注不月者不正遇禍終始惡明故畧之

附昭二十二年冬十月王子猛卒注月者方以得位明事故從外未踰年君例

討賊例時

隱元年夏五月鄭伯克段于鄆注月者責臣子不以時討與殺

州吁同例

四年九月衛人殺州吁于濮注月者久之也

宣十一年冬十月楚人殺陳夏徵舒

案月者責臣子不以時討又起下丁亥正貶楚子文

內殺大夫有罪不日無罪日

莊三十二年秋七月癸巳公子牙卒注日者行誅親親猶有恩

也

案傳以叔肸稱弟牙不稱弟注以莊不卒大夫而卒牙知有罪誅也

諸侯相執例時

僖五年冬晉人執虞公注不從滅例月者畧之

十九年春王三月宋人執滕子嬰齊注月者深責之

案定元年疏知諸侯

相執例書月者正以襄十六年三月晉人執咎子知斐子十九年三月晉人執邾婁子之屬皆書月故也案二條俱不蒙月晉平非伯又不在錄責之例故知例時

執大夫例時

桓十一年九月宋人執鄭祭仲突歸於鄭鄭忽出奔衛注月者

為突歸鄭奪正鄭伯出奔

案大國墓例月

成十六年九月晉人執季孫行父舍之于招邱注言舍而月之

者痛傷忠臣不得其所

定元年春三月晉人執宋仲幾于京師注無例不在常書又月

者善為天子執之

大國君奔例月小國例時

莊四年紀侯大去其國

案不月者紀本子爵小國

劉禮部公羊何氏釋例

文十二年春王正月盛伯來奔注月者前爲魯所滅今來見歸
猶當加意厚遇之

成十二年春周公出奔晉注不月者小國也

襄十四年己未衛侯衎出奔齊注日者爲孫氏甯氏所逐後甯
氏復納之者同當相起故獨日也

昭二十一年冬蔡侯朱出奔楚注時者惡背中國而與楚故略
之

哀十年春王二月邾婁子益來奔注月者魯前獲而歸之今來
奔明當尤加禮厚遇之

內大夫奔例無罪日有罪月

文八年公孫敖如京師不至復內戌奔莒注日者嫌敖罪明則

起君弱故諱使若無罪

宣十八年歸父還自晉至櫟遂奔齊注不日者伯討可逐故從

有罪例也

案注還善辭又宣公同篡不當逐

外大夫奔例時

莊十二年冬十月宋萬出奔陳注月者使與大國君奔同例明
彊禦也

昭二十年冬十月宋華亥向甯華定出奔陳注月者危三大夫
同時出奔將爲國家患明當防之

定十年宋公之弟辰暨宋仲佗石彊出奔陳注復出宋者惡仲
佗悉欲帥國人去三大夫出不月者舉國危亦見矣

大國篡例月小國時

莊九年夏公伐齊納糾注不月者非納篡詞

齊小白入于齊注不月者移惡於魯

增昭二十二年秋劉子單子以王猛入于王城注不月者本無此國無可與別輕重也

復歸例皆時

桓十一年秋九月突歸于鄭注月者奪正

襄二十六年春王二月辛卯衛甯喜弑其君剽衛孫林父入于戚以叛甲午衛侯衎復歸于衛注日者起甯氏復納之故出入同文也以歸出奔俱日知出納之者同

增昭二十有六年冬十月天王入于成周傳言入不嫌也注月者爲天下喜錄王者反正位

卽位不日

定元年夏五月癸亥公之喪至自乾侯戊辰公卽位傳曰錄乎內也注善得五日變禮或說危不得以踰年正月卽位故曰

失禮鬼神例日

隱五年九月考仲子之宮初獻六羽注不日者嫌獨考宮以非禮書故從末言初可知

僖八年秋七月禘于大廟用致夫人注不日者下用失禮明失禮宗廟例時

莊二十四年春王三月刻桓宮桷注月者功重於丹楹

外城例月

僖十四年春諸侯城緣陵注不月者文言諸侯非內城明矣

變制例時

成元年三月作邱甲注月者重錄之

襄十一年春王正月作三軍注月者重錄之

昭五年春王正月舍中軍注月者善錄之

狩例時

桓四年春正月公狩于郎注月者譏不時也周之正月夏之十

一月陽氣始施鳥獸懷任草木萌芽非所以養微

哀十四年春西狩獲麟注河陽冬言狩獲麟春言狩者蓋據魯

變周之春以爲冬去周之正而行夏之時

蒐例時

桓六年秋八月壬午大閱注日者桓既無文德又忽忘武備故

尤危錄

求例時

桓十五年春二月天王使冢父來求車注月者桓行惡不能誅反從求之故獨月

外灾例時

昭九年夏四月陳火注月者閔之

十八年夏五月壬午宋衛陳鄭灾傳異其同日而俱灾也

釋曰昔子思之贊春秋也曰上律天時又曰如四時之錯行日月之代明是以知聖人之文天文也矇者不知日月童子不知經緯以之言天猶扣槃捫燭也故深于天文者不惟知其位次度數而已又能推其薄蝕圍亡之故本于人事而整

齊之故天不言以三光四時爲言視言相萬也聖人不辨以

時月日爲辨視辨相萬也詳畧之以理嫌疑如內殺大夫棄

有罪無罪又以別內外又如外城例月別偏反之以制新義

子內城而緣陵文言諸侯則不月之類

如狩乃常事不書諱致天王以正冬狩桓四年以于郎渡遠

即以春正月譏不時則狩制定復于獲麟之春去正月以改

正朔三者皆以書狩而實非也又如夷狄子弑父書曰

中國子弑父不書曰許止加弑仍書日以別之之類故君

子不必親相與言以禮樂相示而感之者意變色動如子游

之春秋不待褒譏貶絕以日月相示而學之者湛思省悟如美

時日之類是也故曰經世先王之志聖人議而勿辨其言

彌微其旨彌顯使人屬辭比事而辨惑崇德斯善學矣不善

學者或欲屠其贅而悉置之或不得其說而膠執之如穀梁

晉以後治春秋者皆不免崔以其身陷于非聖之法而不之

子方本例趙汭屬辭尤甚

救是猶童昏而彊言圍亡薄餽與以詔相反若誑之其不轉
于溝壑則幸耳可不謂大哀乎

公羊何氏釋例卷二終